

Titikberat aspek pembinaan modul

► Program Outreach Karagasan Ranau

UB 12.12.2015 B1

Oleh JOHAN AZIZ

PROGRAM Outreach Karagasan Ranau 'Scaling Up Education in Community' Universiti Malaysia Sabah (UMS) menitikberatkan aspek pembinaan modul oleh pelajar pascasiswazah yang dikongsikan bersama murid-murid SK Karagasan, Ranau.

Program itu lebih memfokuskan aspek pendidikan melalui modul mata pelajaran yang menumpukan kecemerlangan aktiviti akademik murid, kata Ketua Unit Penyelidikan Pendidikan Luar Bandar (UPPLB) UMS Dr Khalid Johari, di Ranau baru-baru ini.

Program itu adalah anjuran UPPLB UMS dengan kerjasama Pejabat Pendidikan Daerah dan Unit Pimpinan Pembangunan Masyarakat Ranau kelolaan siswa dan siswi pasca siswazah program Kurikulum dan Pengajaran UMS.

Khalid yang juga penyelaras program berkata, dalam menyediakan pembelajaran, murid perlu didebak dengan aktiviti pembelajaran berpusatkan murid yang berunsurkan didik hibur seperti 'Fun Learning' dalam modul

Matematik dan Bahasa Inggeris.

"Kemahiran manipulatif dan kemahiran berfikir berunsurkan kemahiran berfikir aras tinggi (KBAT) diterapkan dalam pembinaan modul Sains oleh para peserta," katanya.

Beliau berkata, program yang telah dilaksanakan oleh UPPLB UMS sejak beberapa tahun lalu itu berjaya mendapat sambutan malah berkesan dalam mengubah dan mentransformasikan pendidikan terutama dalam memberi galakan motivasi kepada belia dan komuniti seterusnya memberi penerangan kepada generasi pelajar tentang peluang melanjutkan pelajaran dan peluang kerjaya.

Pengarah Program Lydia Kimsin berkata, program empat hari itu disertai seramai 24 pelajar Sarjana Pendidikan yang menjadi fasilitator dan lebih 70 peserta sekitar Kampung Karagasan terdiri daripada murid SK Karagasan dan penduduk setempat.

Katanya, antara objektif program adalah bagi mendedahkan pelajar Program Sarjana Pendidikan Pascasiswazah kepada cara merancang dan mengendalikan projek berbentuk kemasyarakatan.



(Gambar atas) SEBAHAGIAN pensyarah UMS dan fasilitator bergambar bersama peserta program Outreach di Kampung Karagasan.

(Gambar bawah) SEBAHAGIAN pelajar yang menyertai aktiviti bengkel pembelajaran Sains dan Matematik.



Pada masa sama katanya, program dapat membantu meningkatkan motivasi murid dalam mempelajari bahasa Inggeris, Sains dan Matematik melalui penggunaan modul mata pelajaran yang dihasilkan sendiri oleh pelajar pascasiswazah.

"Pengisian program ini turut dibantu oleh beberapa orang sukarelawan Persatuan Warga Prihatin Sabah (SUEC) dan pegawai Institut Kemahiran Mara (IKM) yang berkongsi pengalaman dengan belia dan komuniti setempat berkaitan peluang berkursus di IKM," katanya.

Hadir sama, Dekan Fakulti Pendidikan dan Psikologi UMS Prof Dr Ismail Ibrahim, Penyelia Kemajuan Masyarakat Kundasang Japili Sami, Timbalan Ketua Polis Daerah Sarjan Jamil Garatam, wakil kepada Ahli Dewan Undangan Negeri Kundasang Yubidi Gompoy dan Penolong Kanan Hal Ehwal Murid



PERSEMAHAN kumpulan koir murid SK Karagasan.

(Gambar kiri) LYDIA (kiri) menyampaikan cenderahati kepada peserta program.



SK Karagasan Sawalin Zakaria.

Majlis itu dirasmikan oleh Penolong Pegawai Pendidikan Daerah Ranau Fadzul Shemoery yang menggesa masyarakat setempat agar menggunakan pengalaman serta pengetahuan yang dikongsikan dalam program Outreach UMS yang banyak memberi input berguna kepada perubahan masyarakat melalui pendidikan.

"Kita yakin usaha murni UMS yang menjelajah ke seluruh pelusuk pedalaman untuk menyebarluaskan serta berkongsi maklumat serta kemahiran pembelajaran terkini dengan pelajar luar bandar dan juga ibubapa sudah tentu dapat menyemarakkan lagi usaha serta inisiatif penduduk untuk maju dalam bidang pendidikan pada masa akan datang," katanya.

Katanya, keprihatinan UMS dalam membangun agenda pendidikan luar bandar harus dihargai dengan kemenjadian murid luar bandar dalam pelbagai bidang terutama mencapai kejayaan cemerlang dalam pendidikan, seterusnya menjadi aset perubahan kepada masyarakat luar bandar kelak.

SK Kampung Karagasan

terletak 76 kilometer dari pekan Ranau dengan melalui jalan tidak berturap dan majoriti daripada suku kaum Dusun dan Sungai.

Majlis dimeriahkan lagi dengan persemahan tarian, koir, nyanyian yang dapat mengekspresikan bakat terpendam selain aktiviti riadah kecerdasan dan ceramah serta dialog kerjaya.



SEBAHAGIAN pelajar yang menyertai aktiviti riadah.